

廣 濟  
聽 壽

卷十卷十一  
守心圖文新集

御書樓藏板

重脩定海廳志敘

直省各府縣之孤懸海外者有四焉粵之瓊州閩之臺灣  
江南之崇明浙江之定海是也瓊與臺灣素稱劇郡物產  
饒富以定海較之僅一隅耳然瓊屬之煙瘴臺灣之番夷  
不靖人咸患之而定海無異內地也崇明境治與定海埒  
其風土民情亦相等然平沙曠衍無險要地以視定海之  
枕山面洋於層濤噴湧之間有萬島環拱之勢兼以補陀  
洛伽諸勝地爲仙佛所窟宅則山嶽之秀勝於崇明而屯  
兵守險碁布星羅外以控制大洋內則屏障海口較崇明  
爲尤重故昌國舟山諸志有宋以來纂不一人而我

朝康熙乾隆間兩次脩纂良以海疆巖邑官斯土者所當

定海廳志

卷一

敘

撫集其民人訓練其士卒周知其險阻以備不虞而筆之  
於書以示後人也夫乾嘉至今日百餘年矣戶口日繁土  
田日闢以及軍伍汎地鹽法財賦之日增日密不可無以  
誌之以信今而傳後志之宜脩也亟矣余奉

命視學兩浙之明年按試之甬知廳事史君佳若以所纂  
志稿屬余敘并屬參酌而審定之余維巡試之暇其於地  
方民習例得採風問俗以周知其故今觀其書近據康熙  
乾隆之舊志遠搜寶慶大德之遺編旁及史鑑各書以資  
考證而自乾嘉以後增入者攷之檔冊詢之耆舊必詳必  
確不尢不遺勒爲成書釐成三十卷體例悉合敘次分明  
而其尤善者莫如大事志一卷於斯邑之源流得失歷代

之沿革興廢瞭如指掌余乃嘉史君之兩任斯邑此願竟償而尤賴人士之參贊而有成然則斯志也真足信今傳後哉夫今之視昔猶後之視今吾知斯志之成視康熙乾隆兩志而加詳而史君以文章飾吏治且與江陰之繆公武進之莊公後先輝映並垂不朽己光緒六年庚辰秋七月

欽命工部右侍郎浙江督學使者太和張澐卿撰

敘

定海故春秋甬東地唐曰翁山宋曰昌國元升爲州明復爲縣又改爲所繼而復舊土人則以舟山呼之

本朝康熙間改舊定海縣曰鎮海而以定海名舟山道光間又升縣爲廳始徑達監司不屬甯波府治其地懸居海外有秀岱蘭劍金塘五山環繞左右洵四明之門戶兩浙之藩籬也初爲盜賊逋逃藪官不甚過問自宋高宗避金航海嘗駐蹕於此遂爲重鎮前明中葉巨盜勾結倭人出沒劫掠閭閻病之久而後定及其國亡後餘孽竊踞逋臣稽戮至康熙十餘年始次第削平迨道光辛丑英夷一再入寇陷城兵力未之能及迨議款而後來歸於是內增陸

定海廳志

敘

營外設城堡故粵逆之亂浙境幾失八九而賊衆渡海闖伺定城屹然獨存且官軍由此而進恢復浙東各郡以一隅之地爲大海砥柱爲全省樞紐其關係不綦重與然非我

聖朝累治重熙

德洋威讐豈能亂而復治失而復得俾居其地者獲衽席之安享魚鹽之利若此此尤脩志之舉不容少緩者也志昉於有宋紹熙寶慶我

朝則一創於康熙之繆大令燧再續於乾隆之莊大令綸渭迄今又百餘年矣况當兵後文卷冊籍遺文軼事懼多放失不全故搜輯尤亟前陽湖史君佳若再蒞是邦以繆

莊二君皆鄉先達願有以繼之乃延請一二名宿重脩廳志事增於舊文簡於前共得三十卷會史君去任未及棗行而漢陽陳君子固承其後恐書中不無舛漏復以示余俾爲之敘余老矣又病憊未暇詳觀而轉屬黃孝廉以周黃故家舟山且志之脩也曾與聞而未逮竣事旣爲之博考羣籍凡意有未安者無不一一標出之余因舉以復陳君庶幾重加參訂盡美盡善而後授之梓人焉光緒八年秋八月二品頂戴鹽運使銜浙江候補道無錫秦緡業敘

敘

事有前人爲之後人踵之勿替前人之書以垂後人之鑑者雖才力不逮而抱遺訂墜之功所不敢自諉也定海志乘一書躬於宋紹熙間邑令王阮厥後有馮福京之大德志陶恭之正德志陶積之隆慶志何汝賓之天啟志而代遠年湮書缺有間略而弗傳者多矣明季甯昌國衛用武之地也軍書旁午文教失宣伏莽之區典章散軼

國朝康熙間始設縣治以屏蔽甯郡而保障浙東其時江陰繆公燧來任縣事迺探討遺文兼資故實纂定海縣志八卷乾隆間武進莊公綸涇涖任又掇拾藝文爲定海續志一冊得二公經畫周詳蔚然遂臻美備余竊慕繆公之定海廳志

敘

有以闡其先莊公之善承其後也迄道光年間兩遭夷患旋就撫議以海疆巖邑重其權始不隸於郡而以直隸廳同知領之遂爲防禦之要衝而規模益敞同治乙丑余攝廳事甫下車求繆莊二公舊志其留貽者碩果僅存慨然以纂輯爲己事未幾改任去不果光緒丙子重涖是邦議伸夙志賴紳耆協力詢謀僉同始獲籌集經費延致名宿旁羅載籍鈎稽文牘並采大德四明寶慶延祐諸志要仍繆莊二公之舊而補掇其闕略考證其得失條列其異同以丁丑仲秋設局纂脩三閱寒暑而告歲噫成書固若此之難也竊維定海志自

國朝以來迄今凡三脩繆志成後幾六十年莊公繼之莊

志成後又百餘年而致馴實續脩之繆莊二公居同郡仕  
同官後先輝映政聲翕然赫赫若前日致馴以菲材繼其  
武歷官行政不克媲美前賢蓋自量已審卽是編之成其  
所謂輕重詳略之宜審擇取舍之權衡未知有當於繆莊  
二公之旨與否顧以鄉先達之遺緒及今踵而行之亦事  
會時勢之適然有出於不自知者惟疊經兵燹文獻無徵  
抱殘守缺僅能成編後有作者尙進而裁之幸甚幸甚  
光緒六年歲次庚辰

誥授通議大夫三品銜候選道知定海直隸廳事陽湖史  
致馴謹

敘

今之舟山春秋時之甬東地也舛縣於唐升州於元其間廢置併省不一要未有不以舟山爲重鎮也其地雄踞海外嵒山環峙羣港四達自古稱爲天險明初從湯和議廢縣置所徙民入內當時臣民咸以爲不然後世亦不能以信國之賢爲之曲諱我

聖祖仁皇帝一統寰宇底定四海鑒明代之失策重建縣錫以今名

宣宗成皇帝又升縣爲廳以重其權此

天錫之智

廟畧之全卓躒於前古昭著於方策者也元明舊志大半

定海廳志

敘

散佚

國朝康熙間所脩縣志經周公聖化繆公燧兩賢令相繼成書於田賦軍政學校選舉諸大典載之悉備而遺黎休養之難荒田墾闢之苦以暨山海險阻之要言之尤詳前任知廳事史君致馴又延邑中諸名士重修廳志首紀皇言次以圖表傳志畧圖列爲三表列爲四傳列爲五志分爲十有二略分爲二體裁之善有過前志而勝國徙內之失我朝復縣之得又歷載前人章奏議論以明定海重地有關浙東諸郡猶前志也嘗讀顧炎武郡國利病書顧祖禹方輿紀要並以明太祖增設衛所爲善湯信國廢徙縣民爲非胡宗憲論舟山五穀之饒魚鹽之利可以食數

萬衆不待取給於外必修復舊縣而後可楊鶴論舟山仍宜復縣以固浙東之藩籬唐順之論江南控扼在崇明浙東控扼在舟山天設此險以蔽江浙門戶二顧之書皆歷引之則舊新志拳拳於此者非邑人之私言也亦非守茲土者無所見於此而錄之方志也今史司馬去矣志稿具在僕承其後將授諸手民因念舟山之險要關係數郡與他縣之形勝有別其志之恭紀

聖朝復城社養兵民崇疆吏之職嚴烽埃之守文教武功超越往古亦與他縣志紀載一方沿革無大利病者不同迺復以藁就正於秦觀察澹如先生參訂成書遂梓而行之時在光緒八年元黠敦牂之歲知廳事蘄水陳恩受敘

叙

事有莫爲之前雖美勿彰莫爲之後雖盛勿傳若定海今之所謂舟山者孤懸邊海屹若長城旣川嶽以交輝復仙源之近接其與江南之崇明粵東之瓊州閩省之臺灣美盛並傳形同事俱物產魚鹽之利山成舟楫之形靈秀獨鍾設險有備攬物華於天寶旣庶復殷占人傑於地靈洵美且好誠四明之勝地兩浙之雄藩過是地者莫不豔羨稱之此間人情風土源流得失歷經古今前任纂成志帙雖簡編所載未及周詳然地以人傳典章具在一自劫灰之屢見遂令散軼以難修繼述之端責無旁貸斯山四面濱海撫治維艱外夷生窺伺之心內患有結連之慮雖關

定海廳志

叙

鍵可守究非耳目所能周閱自元明以迄於今其間由縣升州由州升廳嗣後又復廳爲縣道光間又升爲廳歷數世之相傳而更張迭事良以定海古稱劇郡允宜重以事權故不得不爲之審量於其際也官斯土者苟無德化以及之欲使鷓鴣風可革虬吠無驚知必有難乎其爲者已前明倭夷迭犯道光英夷入寇咸豐復有粵匪之亂其中得失相因幾經蹂躪幸賴我

朝福威遠庇得以轉危爲安保全不失者匪獨定海之福實亦全浙之福也乙酉春正前任陳君因病出缺廳事虛懸藩得以謬膺斯篆二月初十奉檄旨險莅任正值法夷撲犯鎮口當經 提憲歐陽軍門先法制之復又指揮所

部相機痛擊洞中法輪自是法夷膽寒志不得進以是停輪於所屬之金塘地方離城祇六十里瞬息可通蓋是時法夷勢尙遷延意圖報復雖此地防軍雲集日夕戒嚴而殷富之家仍多遷徙莅任後正當此衝首辦鄉團繼編保甲清釐案牘昕夕無虛迨今夏中法事定防軍漸裁半載之間稍盡厥職質諸衾影可告無慙間嘗於案牘餘閒旁採風土洞察人情知斯廳志乘一書舊板散失而前任史君迭次集款修刊未竣解任實缺陳君有志續修亦以資斧不濟防務殷繁無暇及此功虧一簣機阻半途亥豕魯魚未能詳較心竊竊焉傷之今史陳兩君往矣藩得以謬承其後用敢不揣固陋竭力經營思必有以接踵而纂成

定海廳志

敘

二

之以補史陳兩君未盡之志第事經數任未克葺工今始成於一旦不致再託空言是亦守斯土者之大幸也抑亦史陳兩君有以默禱默佑而成之者歟從此人文蔚起簡冊輝煌信後傳今交相勸勉諒亦同志者之所欣羨者耳光緒十一年歲在旃蒙作噩壯月穀旦知定海廳事都昌黃樹藩謹叙

定海廳志凡例

一志以徵實比事屬辭惟取達意而止明代武功朝邑二志以簡得名然簡而遺漏未免太簡是編詳所當詳簡所可簡勿偏執康韓之見

一增改舊志必有依據前人所作原非一成不可易漏者補之誤者正之脩志者責也是編所增改者注明出處或條下案語俾閱志者可以檢校原書互參得失其有字譌文奪無原書可以核正者姑仍其舊以存疑

一前志所載事實掌故祇可增不可削間有文冗義晦略加點竄以歸雅馴非矜專輒之見

一地名官名代有沿革當隨各朝所定質直書之庶無牽

定海廳志

凡例

混之弊石林葉氏曰今人於官名地名樂取前代名目以爲古雅將一代制度疆宇皆溷亂不可曉今纂新志未敢再蹈前轍

一地名有合二字爲名者不可摘取一字稱甯波曰甯與甯國甯武無別稱定海曰定與定陶定遠無分朦混實甚又如稱鄰縣爲某邑稱知縣爲邑侯皆不可爲訓雖志錄舊文未能悉改今所新纂未敢沿襲

一兵戎爲國之大事例當詳敘始末以爲後鑒阮文達公謂地志之書當立大事記意蓋爲此康熙志錄嘉靖倭寇及明末魯王事於遺事條內未合志例今將熙甯立縣以來所遭兵寇悉編入大事志中俾覽者觸目警心

亦足爲思患預防之助云

一星野之說本無依據卽如斗牛女爲吳越分星浙江全省之休咎或可占諷州縣焉能析分故載諸省志則可而廳志可不錄也惟北極出地度及日出日入時刻隨地不同此無庸略是編刪星野而爲天文表職此之由一開方計里推表山川繪圖之法也圖不能詳繫之以說說不能顯實之以圖義文互見相輔而行舊志縣境有圖縣治有圖學宮有圖村莊亦各有圖圖實較他志爲備惟繪之之法尙有未諳今纂新志專屬一人明算者徧歷地界得其縱橫廣袤里數縮諸篇幅而以開方行之庶不失古人繪圖之意

定海廳志

凡例

二

一康熙志人物不分子目體例是善今依其例悉按時代爲傳其因祖父而附及其子孫因子孫而先敘其祖父者不拘

一列傳取法正史史例有一事足稱者卽可入傳其事行多著述富者亦不聞限以篇幅班固撰司馬相如董仲舒賈誼等傳述其賦篇策論揚雄傳且錄其太元法言阮文達公劄 國史儒林傳體摘其著述之大者以入於傳多至數萬言蓋意在表章不嫌其文之繁也是編間亦有仿其體者

一采訪所收譜牒行狀家傳其中不無溢美之言茲兼詢故老擇其可信者錄之

一 人物寓賢不可牽混康熙志列表甫於人物附郭維於寓賢均非核實此類悉從更正

一 列女按代爲傳其無事蹟可徵者別爲姓氏錄

一 守節婦女專傳以禮部旌例爲斷間有不合旌例而賢德懿行不可掩沒者亦著於傳

一 生存例不立傳至其事實藝文有關鄉里者誠恐日久遺忘或致湮沒因爲隨事附存以見梗槩

一 職官按代爲表旁行斜上體仿周譜先將歷朝官制及職掌撮敘於前以見因革表分文武各著其籍貫出身及蒞任年月惟是志久不脩中間疊經兵燹檔冊無存不能一一皆備於所不知蓋闕如也

定海廳志

凡例

三

一 志家之載選舉率以進士舉人貢生武選等各分門類又以進士冠首而舉貢以次編於後於是一人之由貢獲舉而成進士者先見進士科分再尋鄉舉時代顛倒殊甚今以年經事緯之法列之爲表庶無是失其由進士舉人出仕者卽於本人名下注明官至某職附監祇錄出仕者捐納虛銜不錄

一 選舉一表先將歷代舉士程式標列於前以明源委有定海人以他籍舉及他縣人以定海籍舉者俱別白書之或通籍後始居茲地子孫因之占籍者於本人祇爲立傳不入表中

一 職官選舉用表年經事緯所以使先後次第不凌亂也

間有年無可稽難馭以經緯之法者則歷敘其名於後  
如在乾隆朝附於乾隆之末  
在嘉慶朝附於嘉慶之末 司馬氏三代世表於夏泄

而下列敘焉而不縱橫其體蓋亦史氏疑以傳疑之意  
一山川古蹟曾經先輩題詠采其尤者雙行附注本條之  
後一切澀體膚詞概不收錄

一寺觀之建起於釋氏儒者所不道姑依舊志所有者錄  
之其新創者不入

一遺文錄其有關掌故及事可爲法戒者至如詩話小說  
之類概從刪汰

一吾鄉藏書寥寥所徵實者又少善本引用不無舛誤拾  
遺訂謬尙有望於後之君子

定海廳志目錄

卷首

皇言紀

卷一 圖一北極出地

卷二 圖二輿地

卷三 圖三營建

卷四 表一天文

卷五 表二建置

卷六 表三職官

卷七 表四選舉

卷八 傳一名宦

定海廳志

目錄

卷九 傳二上人物

卷十 傳二下人物

卷十一 傳三列女

卷十二 傳四寓賢

卷十三 傳五仙釋

卷十四 志一疆域

卷十五 志二風俗

卷十六 志三上田賦

卷十七 志三下田賦

卷十八 志四學校

卷十九 志五上軍政

卷二十 志五下軍政

卷二十一 志六祀典

卷二十二 志七營建

卷二十三 志八藝文

卷二十四 志九物產

卷二十五 志十禮祥

卷二十六 志十一上雜志

卷二十七 志十一下雜志

卷二十八 志十二大事志

卷二十九 畧一舊志

卷三十 畧二遺文

定海廳志

目錄